

In questa puntata il nostro Adino Libralato ci parlerà della storica burla legata al mese di maggio

Almanacco 1 maggio 2023 “portar Majo”(domenica 07/05/2023)

El mese de majo, ogni ano, metia in gara squadre de tosatoti che se metia d'acordo pa combinare qualche scherzo. De sera, a Contrada se incontrava torno al Capiteo pa 'l Fioreto. Jèra questa l'ocasion d'oro par i tosi de metarse a pati par chi e dove combinare qualche bel tiro. Questo se chiamava portar majo. E a pagarghene le spese, jèra le tose da moroso e no solo lore. In particolare ghe toleva de meso i fiori o i attrezzi desmentegadi fora. Nel caso de 'na tosa simpatica se ghe inpinia 'a corte de fiori portai via a una antipatica ricambiada co faje de oltrighe o roe. A quele pezo pòdeva rivarghe qualche forcada de paja o de fen, e peso oncora 'na cariolada de leame fumante! A i pì salvadeghi capitava de trovarse grapa, cariola, forche, rostei...picai su pa on albero! Tuti savea de chi jera opara sta bravura, ma tuti fea finta de ninte pa no chiamar replica! E a muso duro e bareta fracà le femene fea el giro de le case a recuperare le so robe!

Almanacco 2 Majo 23 Felice Polanzani. 14/05

Adino Libralato presenta Felice Polanzani, un noalese incisore

artista di respiro internazionale

Felice Polanzani, architetto nato nel borgo de Noale nel 1712 more a Roma nel 1771 dopo 'na vita artistica fenomenale so 'l campo de l'incision. Dopo aver lavorà a Venezia, 'l se jèra trasferio a Roma, come maestro de intalio, a l'Istituto S. Michele a Ripa, dove che 'l saria sta anca maestro de 'l grande Gian Batista Piranesi. A Piranesi 'l ghe gavea dedicà la famosa acquaforte che lo celebra per la publicasion de l'opara "Antichità Romane". Infinita risulta l'estension de i so lavori che ciapava spunto da famose publicasion de opere d'arte o opare cartografiche, geografiche, storiche o leterarie. Par tuta la so vita, a Venezia, dove 'l gavea scomizià nel 1739, 'l xè senpre sta ativo come "intagliatore di lettere". Famose le so incision par la "Gerusalemme Liberata" e i "ritrati di uomini illustri" ricavai da opere di A. Van Dyck. Ne la so intensa attività 'l gà perfezionà la tecnica de l'acquaforte e del bulino fin a diventarghene maestro insuperabile. A sto artista raffinato, famoso in tutta Europa, Noale ghe gà intitolà l'importante strada che dal centro porta verso Venezia e adesso, propio de sti giorni, lo gà ricordà co 'na mostra de peso internazionale.

Noale, 08/05/2023

Adino Libralato

Almanacco 3 Majo 2023 S.Urbano. 21/05/23

Il nostro Adino Libralato ci ricorda una delle sagre di Moniego, Sant'Urbano

Una de le tante sagre che la parochia de Moniego tien su xè quela de Sant'Urban che se festeja ne l'ultima decade de majo. Con 'l nome de Urbano Primo, papa a Roma par nove ani, 'l xè morto tra il 19 e el 25 de majo de l'ano 230. Se dise che "a Sant'Urban ua e formento xè a mezo gran". In particolare sto santo vien invocà a protesion de la ua, contro 'l pericolo de bròse tardive. Anca 'l vin va soto 'l so ocio parchè, co i primi caldi, no 'l vaga in aselo o no 'l ciapa 'l cagnon. In onore de sta tradision, par tanto tenpo, fin a qualche ano indrio, a Moniego, se organizava 'na interessante mostra de i vini veneti par opara del conpianto dott. Luigino Bovo. Dopo la so sconparsa e co 'l nasare de altre iniziative, la mostra se ga perso, lasandoghe logo a altre robe, tipo la caminada "Andar par erbe". Quello che però continua a tegner banco resta la gran magnaora da senpre organizada a scopo sociale da 'na inbatibile squadra de brave coghe e bravi coghi sostegnui da un servisio ben curà. E questa xè la seconda sagra de Moniego... pì vanti ghin vedaremo de altre, parchè sto paese star fermo no 'l xè bon senza 'na sagra par ogni stajon.

Noale, 08/05/2023

Adino Libralato